



## MEMORANDUM

### O RAZUMIJEVANJU I SARADNJI U OBLASTI RADIJACIJSKE I NUKLEARNE SIGURNOSTI I ZAŠTITE STANOVNIŠTVA

između

Ministarstva sigurnosti Bosne i Hercegovine, sa sjedištem u zgradbi Institucija Bosne i Hercegovine, Ulica Trg BiH broj 1, u Sarajevu,

i

Državne regulatorne agencije za radijacijsku i nuklearnu sigurnost, sa sjedištem u Ulici Hamdije Čemerlića broj 2, u Sarajevu,

U daljem tekstu: Strane potpisnice.

#### I - OPĆE NAPOMENE

*Sagledavajući* globalne prijetnje sigurnosti i rizike nesreća uslijed prekograničnih nuklearnih i radijacijskih akcidenta i akata terorizma, uz moguću upotrebu oružja za masovno uništenje, koje mogu imati velike posljedice za stanovništvo u Bosni i Hercegovini,

*Uzimajući* u obzir rizike od nesreća uslijed radijacijskih i nuklearnih prijetnji i tehnoloških hazarda na teritoriji Bosne i Hercegovine, i rizika od nesreća sa prekograničnim efektima, procjenjenih u dokumentu Procjena ugroženosti Bosne i Hercegovine od prirodnih ili drugih nesreća,

*Imajući* u vidu izazove koje radijacijske i nuklearne prijetnje predstavljaju za sistem sigurnosti Bosne i Hercegovine u organizaciji mjera zaštite stanovništva od ionizirajućeg zračenja i suzbijanje različitih kriminalnih aktivnosti sa izvorima zračenja,

Ministarstvo sigurnosti BiH i Državna regulatorna agencija za radijacijsku i nuklearnu sigurnost, kao Strane potpisnice, izražavaju spremnost, da u domenu utvrđenih nadležnosti kroz buduće zajedničke aktivnosti značajnije unaprijede saradnju u oblasti radijacijske i nuklearne sigurnosti u svim segmentima, u svrhu sigurnosti i zaštite stanovništva u Bosni i Hercegovini, kao što se navodi u modalitetima saradnje.

Vidovi i oblici podrške, te planirani obim saradnje definira se aneksima Memoranduma na osnovu inicijative neke od Strana potpisnica.

## **II - PREDMET SARADNJE STRANA POTPISNICA**

- 1) Predmet saradnje po ovom Memorandumu podrazumijeva sljedeće modalitete uzajamne podrške i saradnje u provedbi zakona iz nadležnosti Strana potpisnica:
  - a) stručna pomoć i podrška u implementaciji međunarodnih obaveza na osnovu ugovora koje je potpisala i ratifikovala Bosna i Hercegovina, a koji se odnose na oblasti radijacijske i nuklearne sigurnosti i bezbjednosti, neširenja nuklearnog oružja i nuklearnog terorizma,
  - b) stručna pomoć i podrška u izradi propisa od značaja za oblasti iz nadležnosti Strana potpisnica,
  - c) monitoring, interpretacija i dostupnost podataka o rezultatima mjerjenja ionizirajućeg zračenja u sistemu ARGOS i sa njim povezanim gama stanicama za mjerjenje prekomjernih doza zračenja,
  - d) uzajamna komunikacija, razmjena informacija i davanje zajedničkih izjava, od značaja za preventivno i operativno djelovanje Strana potpisnica, kao i razmjena svih podataka koje tretira predmet memoranduma a koji su na raspolaganju Stranama potpisnicama i uključenim nadležnim ministarstvima i organima uprave iz strukture kojom Strane potpisnice koordiniraju,
  - e) stručna pomoć i podrška u planiranju za radijacijske vanredne događaje,
  - f) stručna pomoć i podrška u radiološkoj kontroli granice i roba koje prelaze granicu na prisustvo opasnih izvora zračenja, borbi protiv terorizma i primjeni oružja za masovno uništenje, civilnoj zaštiti, kao i u oblasti forenzičke i vještina kod prisustva opasnih izvora zračenja,
  - g) stručna pomoć i podrška u donošenju mjera prevencije i pripravnosti, kao i predlaganju i provođenju adekvatnih mjera i zadataka u koordinaciji odgovora na nastali radijacijski vanredni događaj, ili prirodnu nesreću sa posljedičnim radijacijskim vanrednim događajima, iz nadležnosti Koordinacionog tijela Bosne i Hercegovine za zaštitu i spašavanje,
  - h) stručna pomoć i podrška u uspostavi adekvatne strukture odgovora i upravljanja, kao i edukaciji, opremanju, obučavanju i osposobljavanju za razvoj znanja i vještina u oblastima iz nadležnosti Strana potpisnica,
  - i) olakšavanje koordinacije nadležnih ministarstava, organa uprave i drugih institucija u primjeni propisa u Bosni i Hercegovini i međunarodnih obaveza iz oblasti u nadležnosti Strana potpisnica,
  - j) saradnja u oblasti naučno - istraživačkog rada i izdavaštva i olakšavanje pristupa naučnim i stručnim krugovima u oblastima iz nadležnosti Strana potpisnica,
  - k) organizacija, učešće i omogućavanje učešća na naučnim i stručnim skupovima, konferencijama, u obukama, seminarima, radionicama, kao i vježbama i drugim specijalističkim modulima osposobljavanja, usavršavanja i razvoja vještina, u BiH i u inostranstvu, a koji su iz oblasti u nadležnosti Strana potpisnica.
- 2) Predmet saradnje po ovom Memorandumu su sve oblasti iz nadležnosti Ministarstva sigurnosti Bosne i Hercegovine, utvrđene Zakonom o ministarstvima i drugim organima uprave Bosne i Hercegovine i pojedinačnim

zakonima koji uređuju oblasti iz nadležnosti Ministarstva sigurnosti BiH, a koje su od značaja za radijacijsku i nuklearnu sigurnost (borba protiv terorizma i drugih oblika organizovanog kriminala, zaštita i borba protiv kibernetetskog kriminala, kontrola i zaštita državne granice, koordinacija policijskih agencija u Bosni i Hercegovini, kontrola kretanja stranaca, imigracije, azil, i drugi poslovi i zadaci Ministarstva).

- 3) Strane potpisnice su saglasne da je sektorski cilj saradnje «izgradnja i razvoj samoodrživih kapaciteta Bosne i Hercegovine za sigurnost i zaštitu građana Bosne i Hercegovine od radijacijskih prijetnji i svih vanrednih situacija sa uključenim opasnim izvorima zračenja» i da će taj cilj ostvariti kroz oblike saradnje utvrđene ovim Memorandumom.

### **III - NADZOR NAD PROVEDBOM PROJEKTA**

- 4) S ciljem osiguranja implementacije projektnih aktivnosti u Bosni i Hercegovini, Strane potpisnice formiraju zajednički tim za provedbu Memoranduma o razumijevanju i saradnji, kroz redovan nadzor i evaluaciju rezultata saradnje.
- 5) Strane potpisnice će održavati sastanke najmanje dva puta godišnje, a po ukazanoj potrebi i češće, s tim da na te sastanke mogu pozivati ad hoc stručne osobe i iz drugih organizacionih jedinica, nadležnih ministarstava i organa uprave entiteta i Brčko Distrikta Bosne i Hercegovine, kao i naučnih i stručnih institucija sa kojima Strane potpisnice imaju ugovorenou saradnju, a po pitanjima iz predmeta saradnje iz ovog Memoranduma.

### **IV - RELEVANTNI PROJEKTNI ZAHTJEVI STRANA POTPISNICA**

- 6) Strane potpisnice iskazuju spremnost da u skladu sa svojim mogućnostima i kapacitetima intenzivno rade na implementiranju cilja i provođenju aktivnosti iz predmeta Memoranduma, od obostranog interesa i interesa Bosne i Hercegovine.
- 7) Strane potpisnice će, shodno utvrđenim nadležnostima i planiranim sredstvima za realizaciju projekata, dogovarati i ugovarati zajedničke aktivnosti iz Memoranduma u svrhu efektivne i efikasne realizacije utvrđenog sektorskog cilja.

### **V - ZAVRŠNE ODREDBE**

- 8) Memorandum je neograničenog trajanja, a može biti prekinut na osnovu najave bilo koje od Strana potpisnica najmanje mjesec dana prije otkazivanja, uz detaljno obrazloženje razloga takve odluke.
- 9) Ovaj Memorandum o razumijevanju i saradnji potписан je u 2 (dva) istovjetna primjerka, na službenim jezicima i pismima Bosne i Hercegovine, gdje svaka Strana potpisnica zadržava po jedan primjerak na svakom od jezika i pisama.

Potpisano u Sarajevu, dana 14. novembra 2012. godine.

Za Ministarstvo sigurnosti  
Bosne i Hercegovine

Mladen Ćavar, zamjenik ministra



Za Državnu regulatornu agenciju  
za radijacijsku i nuklearnu  
sigurnost

Emir Dizdarević, direktor

